

H A R A N G V E

FAICTE PAR LA

Noblesse de Champagne
& de Brie,*Inserée en ces Cayers , Et présentée
à sa Majesté.*

M. D C. X V.

HARVARD

Library
of the
Harvard University

Gift of the
Harvard University

M.C. XV

HARANGVE, FAICTE

*par la Noblesse de Champagne
& Brie inseree en ses cayers, &
presentee à sa Maiesté.*



SIRE,

Auec autant de submis-
sion & d'humilité qu'un
fidele subject scauroit rendre à son
Roy, auquel est empreinte la mar-
que de diuinité, & auec vne affection
non moins grande & respectueuse
que d'un fils obeissant en la presence
d'un bon & charitable pere. La
Noblesse de vos Prouinces de
Champagne & de Brie, prosternee
à vos pieds, Supplie tres-humblemēt
vostre Majesté de prester l'oreille de
vostre clemence ordinaire aux vœux

A ij

qu'elle contribuë avec vne particulière affection pour vostre grâdeur, repos & prosperité; & encores pour escouter les protestations qu'elle faiët sur les autels sacrez & sur les trophées consacrez à vostre Majesté de sa fidelité, candeur, & sincerité, avec laquelle elle veut viure & desirer mourir pour vostre seruice: obeissant à vostre voix puissante & majestueuse, au son de laquelle elle est accouruë pour escouter vos oracles, & prendre de vostre bouche les loix qu'il vous plaira luy dicter, qu'elle grauera avec la poincte de diamant sur la table de son cœur, avec des caracteres si visibles & immortels, que la posterité cognoistra cōbien vous auez esté heureux en la possession de vostre sceptre, absolu en l'establissement de vos volontez, & fort en l'obeissance de vos tres-humbles, &

5

tres-fideles subiects.

Nous voicy donc deuant ce thron
ne esclattant de viue lumiere, esleué
sur les colonnes de iustice, & de pie-
té : dans lequel paroist vostre Maie-
sté, non avec le foudre à la main ar-
mé d'esclairs, & ceint de turbillons,
mais entouré de rayons gracieux qui
attirent vos peuples & conuient les
estrangers à venir admirer vostre
douce grauité, qui promet mille
heureuses influéces à ce iour auquel
il vous a pleu monter au moment de
l'orizon de vostre Maiorité, dans le
ciel de vostre puissance, pour redon-
ner vne nouuelle forme à ce Royau-
me si chery de Dieu, & gardé avec
vn soing tant extraordinaire par la
main de son Ange tutelaire, pour
estre mis entre les vostres, comme le
plus riche ioyau de la Chrestienté,
laquelle voyant & benissant l'action

que vous allez faire, confessera franchement avec beaucoup de ressentiment de ioye, que vous auez succedé aussi bien aux vertus & prerogatiues d'un grand & inuincible pere, comme au grand cœur, grand bon-heur, & au grand & riche royaume que vous possédez. Et que lon vous peut dire avec verité, digne fils d'un grand & digne pere, digne d'auoir l'aissé, auant que s'aller loger parmy les esprits bien-heureux, un si grand, si bon, & digne fils.

Il est bien necessaire, Sire, que pour faire voir la gloire d'une entreprise que vous auez commencee, & luy donner le cercle de perfection que les ames vraiment Françoises luy souhaitent avec des desirs bien ardents, vous ayez ceste vertu paternelle, transfuse dès le berceau, & cette grace qui surpasse celle qu'on

voit reluire ordinairement aux ames
des autres Monarques, pour grâds,
sages, & magnanimes qu'ils soient.
Mais aussi avec ceste grace, que
l'heur accoste tousiours, & que la
grandeur de courage accompagne
par tout, vous ferez des actes cele-
bres qui sentiront l'odeur de ce baul-
me precieux, que nous appellons
faueur celeste, & se rapporteront
particulierement à l'air de ceste be-
nediction, qui s'est faict visiblement
cognoistre en tous les euenemens
de la vie de vostre geniteur, de qui
vous l'avez receu en partage, & que
vous ferez heureusement esclatter
parmy le nuage des confusions qui
se sont insensiblement glissez dans
ce grand corps, duquel vous estes le
chef glorieux, l'ame & l'esprit viui-
fiant. Avec cela vous dissiperez l'air
pestilentieux qui altere sa nature,

redonnerez le temperament de sa
 pristine & premiere santé, causerez
 l'harmonie parmy le discord, & ap-
 porterez l'ordre au milieu du desor-
 dre mesme. Ainsi que ces diuinitez
 que l'antiquité nous recommande,
 pour auoir faict paroistre leur puis-
 sance en deueiloppant du tas de la
 conscience les choses qui auoient
 esté crees confusément & leur par-
 faicte sagesse, en donnant à chacun
 d'eux selon qu'il estoit necessaire, sa
 forme, son estre, & sa situation.

Et encores que les corps bien
 composez ne sentent si tost la lime
 du temps, & la corruption que la vi-
 cissitude des choses, & la suite des
 ans apporte à tout ce qu'on voit icy
 bas: toutesfois ils ne peuuent euer
 le coup de quelque mutation qui
 suit le train des siecles; & rapportent
 les naturalistes ainsi que les histo-
 riens,

riens : que s'il sy trouuoit vn corps
 soit Monarchique ou autre qui ne
 peut estre alteré par des choses exte-
 rieures & contraires, encores se de-
 struiroit-il soy mesme, tant la nature
 se plaist en la vicissitude & au chan-
 gement. Celuy de vostre Monar-
 chie, Sire, a ceste gloire d'auoir plus
 percisté en sa duree, & auoir moins
 senty d'alteration que nul autre
 Estat, Empire, ny Royaume : tant
 pour estre composé avec vne cym-
 metrye plus excellente, que pour
 auoir des qualitez plus repugnantes
 à la corruption : ainsi que l'on rap-
 porte de l'or & de l'argent, qui sont
 moins corruptibles que tous autres
 metaux : & encores qu'il soit moins
 corruptible pour le bon ordre causé
 par la parfaicte forme de gouverner
 que vos predecesseurs luy ont esta-
 blie, & de laquelle ils se sont de si

long temps seruie. Il sy trouue maintenant quelque disproportion & dissonance, pour n'auoir esté les ressorts premiers, & principales cordes maintenües & tendües, avec le mesme soin qui auoit esté iustement prescrit, & sainctement ordonné par vos majeurs. L'honneur, comme le soin d'un establissement & de ce nouuel ordre, vous a esté reserué par le Ciel, afin que par là l'on tire des augures certains & prononstiques veritables, que les annees de vostre regne seront composees de iours remplis de miracles, & qui veritablement les Heures filles du Ciel, nous ont ramené ce tant aymable siecle, où les palmes & les lauriers doiuent croistre heureusement entre les Lys que vostre France chérit, & sur lesquels elle verse vn nombre infiny de mille & mille benedictiōs.

Ceux qui nous ont deuancés, & desquels les os sont tousiours reclus dans le tombeau, ont tant de fois souhaitté de voir ce que nous voyons maintenāt, & soupiré si ardemment apres la reformation que le bon genie de la France a fuscité, & voulu permettre seulemēt au temps auquel il a iugé que vous pouuiez heureusemēt manier vostre Sceptre, & tenir d'vne main ferme les resnes de vostre Empire. Nous auons donc ce contentement & cest aduantage sur nos peres, nos peres (dy-ie) qui ont versé si librement & courageusement leur sang pour s'oposer aux obstacles qui menaçoient leur chere patrie de perte & naufrage que nous auons fidelement accompagné parmy l'horreur & l'effroy, suyuant cette ame inuincible du grand Henry, qui triomphe à cette heure au ciel,

apres auoir esleué à la honte de ses ennemis des trophéz glorieux en terre. Nos peres qui apres tant de perilleux traualx ne pouuoient toutesfois iouir qu'en Idees, & par esperance de ce que nous possedons veritablement & en effect, qui faict que nous nous estimons d'autant plus heureux que sous vostre doux & pacifique regne, à l'ombre des Palmiers que ceste sage & grande mere a soigneusement cultiué, & tendrement arroufé: nous cueillons les fleurs d'amour, de paix & de mutuelle affection. Et verrons la face de nostre terre renouuellee, tellemēt que nous ne nous en porterons nulle enuie à ceux qui habitent la partie du monde, où l'on nous assure souffler le Zephir gracieux, que regne vn printemps perpetuel, où nul vent seditieux ne peut esleuer les vapeurs

pour esmouuoir les tempestes & l'orage.

Et ne faut point douter que sous ces palmiers, qui sont hieroglifes de victoires, nous ne conceuions des desirs genereux, de les aller transplanter estant à vostre dextre, iusquaux lieux les plus auancez dans l'Orient, où vous commanderez de chanter des hymnes duës aux conquestes glorieuses que vostre Majesté y fera, imitant en cela ceux qui l'ont deuancé, & qui par ce moyen se sont acquis vne louange immortelle. Là vostre Noblesse Françoisse, de laquelle celle de vos prouinces de Champagne & Brie, faict vne bonne partie, fera voir comme veritablement elle est composee de ce sang bien purifié, dans la plus noble & plus excelléte partie de vostre Estat; que son naturel plein de courage & de hardiesse, ne respire autre chose

que les combats & les assauts, qui ont pour obiet la gloire de son Dieu, & l'honneur de son Roy: puisque sous le premier elle ne feroit sortir du centre de son Océant, pour recevoir son premier estre, & sans le second elle n'auroit l'estre complet, qui consiste en sa fidelité & en l'obeissance qu'elle doit à vostre Maïesté, se tenant obligée par vne recognoissancē particuliere à la bonté diuine del'auoir faict naistre pour seruir vn Roy si grand, & si puissant, & de qui les siècles futurs parleront avec estonnement, comme le nostre faict avec admiration de celuy qui vous a trassé le chemin pour nous conduire, ainsi que luy, dans le Palais sacré de l'immortalité.

L'esperance que nous auons (Sire) d'ouïr les acclamations faictes par la voix de vostre peuple pour l'vtilité qui procedera de cette sain-

ete resolution qui vous à pleu faire
sur le reſtaſſement de voſtre
Royaume, nous conuie à ſouhait-
ter de cœur & d'affection, d'en voir
bien toſt la bien-heureuſe fin, puis-
que de la doit proceder la grace
d'une nouuelle ſaincteté neceſſaire
au corps Eccleſiaſtic, ſortir ſur celuy
de voſtre Nobleſſe l'eſclat de ſon
ancienne ſplendeur, qui ſembloit
auoir eſté durant quelque temps
caché parmy le nuage des troubles
paſſés. Comme auſſi l'équité & la iu-
ſtice qui ſembloient auoir quitté
tout à faiēt leurs ſieges Fleurdeliſés à
l'iniuſtice, & à l'antiquité, regneront
auec la meſme authorité qu'on a veu
au temps que l'on venoit icy chercher
des ames, leſquelles par leur doctri-
ne, candeur, & ſincerité, ſ'eſtoient
renduës dignes arbitres de tout le
reſte du monde. Ainſi (Sire) apres
auoir faiēt voir voſtre Royaume

embelly par vne nouuelle naissan-
 ce, nous verrons vostre M. occupee
 non plus à restablir son heritage, si
 bien restitué, mais à l'accroistre & l'a-
 grandir des limites de ceux qui pro-
 fanant nos autels, ont estably ty-
 ranniquemét le croissant au lieu où
 la seule Croix de nostre Sauueur
 doit glorieusement triompher
 ornee & parsemee de vos Fleurs de
 Lys, pour l'exaltation & grandeur
 desquelles nous sacrifions humble-
 ment aux pieds de vostre Maiesté ce
 sang, ce courage, ce bras, ceste espee
 qui sont vostres par vostre naissan-
 ce: & que nous preuuerons encores
 estre veritablement vostres par a-
 mour, affection & fidelité: amour,
 affection, & fidelité, qui ne pour-
 ront iamais estre affoiblies, ny par
 les siecles, ny par la mort.